



# Berita KUKUM

## H //LAWATAN MUHIBBAH KOLEJ UNIVERSITI TEKNOLOGI TUN HUSSIEN ONN (KUITTHO ) KE KUKUM

Tanggal 13 -15 Mei 2004, seramai lebih kurang 70 orang staf Kolej Universiti Teknologi Tun Hussien Onn (KUITTHO) telah mengadakan lawatan muhibbah ke KUKUM. Delegasi staf KUITTHO tersebut diketuai sendiri oleh Rektornya, Y. Bhg. Prof. Dr. Hj. Ismail Hj. Bakar dan beberapa orang ketua jabatan KUITTHO. Pihak KUKUM telah mengaturkan beberapa aktiviti sebagai mengalu-alukan kedatangan delegasi tersebut.

Seawal 7.45 pagi, 14 Mei 2004, program senamrobi bersama delegasi KUITTHO telah diadakan di Kampus Kubang Gajah melibatkan semua staf KUKUM. Aktiviti berlangsung dalam suasana ceria dan harmoni apabila staf KUKUM bekerjasama membantu membimbing pada delegasi mempelajari tarian poco-poco. Seterusnya para delegasi dibawa melawat Kompleks Makmal KUKUM di Kuala Perlis. Taklimat berkenaan kemudahan makmal disampaikan oleh En. Mohd. Ezral Baharudin dan Prof. Madya Dr. Zul Azhar Zahid Jamal.

Aktiviti diteruskan dengan beberapa pertandingan sukan persahabatan pada sebelah petang. Antara acara yang dipertandingkan ialah bola sepak, ping pong, bola jaring, bola tampar dan badminton. Pertandingan dilangsungkan di Padang Kolej Matrikulasi , Arau Perlis. Suasana berlangsung dengan ceria dan permainan dijalankan dengan semangat kesukuan yang tinggi.

Pada sebelah malam pula, sebagai meraikan kehadiran semua delegasi, Majlis Makan Malam Lambaian Muhibbah KUKUM-KUITTHO telah dilangsungkan di Hotel Putra Palace. Majlis turut dihadiri oleh Ketua-Ketua Jabatan KUKUM. Y. Bhg. Rektor KUKUM, Lt. Kol. Prof. Dato' Dr. Kamarudin Hussin dalam ucapannya mengucapkan terima kasih dan mengalu-alukan kehadiran para delegasi dan mengharapkan kerjasama yang berterusan antara kedua-dua buah Universiti. Y. Bhg. Prof Dr. Hj. Ismail pula dalam ucapan balasnya turut mengucapkan terima kasih di atas sambutan yang diberikan oleh pihak KUKUM dan melahirkan kekagumannya dengan kemajuan pembangunan KUKUM yang amat ketara berbanding kedatangan beliau beberapa bulan dahulu. Beliau turut mengharapkan kerjasama yang erat akan terus terjalin antara kedua belah pihak.

Sebelum berangkat pulang ke Parit Raja, Johor, delegasi dibawa melawat ke beberapa tempat menarik di sekitar negeri Perlis . Sesungguhnya kepulangan mereka membawa seribu kenangan manis yang tidak dapat diukir dengan kata-kata. Kepada delegasi KUITTHO- terima kasih di atas kehadiran anda ke KUKUM!

